



Informativni bilten Općine Vareš



SVEČANO OTVORENA ŠALTER-SALA



Svečanim presijecanjem vrpce, u zgradi Općine Vareš 08. 04. 2010. godine su otvorena dva moderna centra za pružanje usluga građanima i to Centar za pružanje usluga građanima (šalter-sala) i Centar za izdavanje dozvola iz oblasti urbanizma i građenja.

Ovi centri su izgrađeni u saradnji sa Projektom upravne odgovornosti (GAP), a ukupna vrijednost je nešto više od 360.000 KM. Od ovih sredstava 185.000 KM je obezbijedio donator za računarsku opremu i softvere, a Općina je obezbijedila sredstva za građevinske radove i kancelarijski namještaj u iznosu od 176.000 KM.

Svečanosti otvaranja šalter-sale su između ostalih prisustvovali predstavnici Švedske agencije za međunarodnu saradnju i razvoj (SIDA), predstavnici Ambasade Kraljevine Holandije u BiH i USAID-a.

Otvaranje šalter-sale će uveliko doprinijeti bržem i efikasnijem pružanju usluga građanima općine Vareš.





POTPISANI UGOVORI ZA STIPENDIJE

U sali Općine Vareš 16. 04. 2010. godine potpisani su ugovori za stipendiranje između četrdeset i pet studenata koji su dobili stipendiju i Ministarstva za boračka pitanja koje dodjeljuje stipendije. Potpisivanju ugovora su prisustvovali ministar za boračka pitanja Zeničko-dobojskog kantona gospodin Sejad Nalić, stručni saradnik Ministarstva za boračka pitanja Zeničko-dobojskog kantona gospođa Fahira Spahić i načelnik Općine Vareš gospodin Hamdo Fatić.

Prije samog potpisivanja ugovora prisutnim studentima se obratio načelnik Općine gosp. Hamdo Fatić koji je ovom prilikom čestitao studentima na dobijenoj stipendiji i poželio im sreću u daljnjem studiranju, uz nadu da će svoje fakultete uspješno završiti i postati korisni članovi društva, koji će svojim znanjem doprinijeti razvoju naše općine.

Ministar za boračka pitanja Zeničko-dobojskog kantona gosp. Sejad Nalić je izrazio zadovoljstvo prosjekom ocjena studenata koji su dobili stipendije i poželio da tako i nastave do okončanja svog studija.

OBILJEŽEN DAN MJEŠOVITE SREDNJE ŠKOLE „NORDBAT-2“ VAREŠ

U četvrtak 18.03.2010. u fiskulturnoj sali MSŠ „NORDBAT-2“ Vareš učenici ove škole su održali priredbu u znak obilježavanja Dana škole. Svi koji su imali vremena doći na ovu priredbu prije samog početka mogli su u holu škole pogledati izložbu učeničkih radova, rađenu raznim tehnikama i na raznim materijalima, pa da nisam pročitao da se radi o izložbi učeničkih radova pomislio bih da su izložene radove radili već dokazani i poznati umjetnici. Moram spomenuti da su

me posebno dojmili radovi na staklu i svili ali ništa manje nisu lijepi radovi na tekstilu i unikatni nakit pa zbog toga moram čestitati našim srednjoškolcima i poželjeti im puno sreće u budućem školovanju i radu.

Program pod nazivom “Multitalents show” je zaista i opravdao ovakav naziv a mislim i očekivnja posjetilaca jer je ponudio mnogo toga raznovrsnog, od folklora sa kojim je i počeo program nastupom folklorne grupe KUD „Harauzi“, preko modne revije kojoj su sponzori bili vlasnici butika, a manekeni učenici i učenice srednje škole.

Naravno to nije bilo sve, jer smo imali priliko čuti nekoliko pjesama u izvedbi benda „Crna dama“ kojeg sačinjavaju učenici ove škole, a kao nešto što se podrazumjeva tako je i na ovoj priredbi bilo skečeva koji su uvijek dobro prihvaćeni od strane publike.

Čestitamo profesorima i učenicima Dan škole, a posebno profesorima: Berini Fatić, Selmi Hafizović i Lari Brđanović koje su sa svojim učenicima uložile mnogo truda u pripremi ovog programa.

PRENOSIMO VAM OBAVJEŠTENJE KOJE SMO DOBILI OD JU „APOTEKE SARAJEVO“

„Poštovani!

Shodno Vašem dopisu broj:02/I-58/10 od 06.03. 2010. godine, obavještavamo Vas da i pored najbolje namjene nismo u mogućnosti da obezbijedimo rad apoteke „Vareš“ nedeljom, jer u Varešu nema kadra kojeg bi eventualno mogli angažovati za rad nedeljom.

Što se tiče Vašeg prijedloga za dežurstva za vrijeme praznika, ubuduće ćemo organizovati rad apoteke sa radnim vremenom od jedne smjene ukoliko praznik bude duže trajao od jednog dana. U nadi da ćete razumjeti navedeno primite iskrene pozdrave.“

S poštovanjem,

GENERALNI DIREKTOR
Prim.mr.sci. Redžad Čatić



IZLET NA PERUN

U organizaciji Turist info biroa, članovi Karate kluba „Vareš“ njih dvadeset i sedam i četiri člana Kluba ekstremnih sportova „Perun-Va“ Vareš uživali su u vikend izletu na Perunu od 26. 02. do 28. 02. 2010. godine.

Ovaj boravak u netaknutoj prirodi na uvijek nadahnjujućem i inspirirajućem Perunu, finansiran je jednim dijelom od sredstava koja su prikupljena od sankaske utrke koja je održana početkom februara, također u organizaciji Turist info biroa, jednim dijelom sredstvima samih učesnika, a potpomognut je i donacijama ljudi koji su prepoznali vrijednosti ovakvih druženja za našu omladinu koji su u ovakvim i sličnim poduhvatima vidjeli priliku za pokretanje i razvoj lokalnog turizma.

Ovakva i slična druženja u organizaciji Info biroa ili nekog drugog kluba, do-

prinose razvoju svijesti kod mladih za očuvanje prirode i razvijaju ljubav prema prirodi. Možda će Perun ili neko drugo izletišta sa područja naše općine, a kojih zaista ima mnogo, u budućnosti biti podignuto na nivo turističke atrakcije upravo zahvaljujući nekome od ovih mladih ljudi koji su bili učesnici ovog izleta.

Turist info biro u saradnji sa Klubom ekstremnih sportova „Perun-Va“ Vareš kontinuirano organizuje druženja poput ovog na Perunu, a sve s ciljem zdravog druženja mladih i razvijanja osjećaja za zajedništvo i saradnju, podsjećanja na prirodna bogastva koja ima naša općina i davanje određenih smjernica kako i na koji način u budućnosti ta bogastva da iskoristimo za dobrobit naše zajednice. Ako kažemo da je ovo šesti ili sedmi boravak mladih na Perunu u proteklom periodu, sasvim je jasno sa koliko ozbiljnosti se pristupa razvijanju svijesti kod mladih za gore rečeno.

DJELIMIČNO OGRAĐIVANJE GROBLJA U MZ BUDOŽELJE

U mjesnoj zajednici Budoželje, u proteklom periodu su održane akcije na čišćenju i uređenju mjesnog groblja. Organizator akcija je Mjesna zajednica koja je ujedno i finansirala kupovinu jednog dijela ograde za groblje koja je uz veliki odziv mještana na ovu akciju i postavljena. Ovoj i sličnim akcijama se odazvalo i UG „Žene Budoželja“ čije su članice radile na čišćenju i uređenju groblja.

Trebam naglasiti da Mjesna zajednica „Budoželje“ podržava i potpomaže sve akcije koje se vode na njenom području koliko je u njenoj moći.





POSJETA KRALJEVSKOM GRADU BOBOVCU

Ako je suditi po prvoj lasti i reći da je stiglo proljeće onda i po prvoj ovogodišnjoj organizovanoj posjeti Kraljevskom gradu Bobovcu, možemo sa slobodom reći da je došlo proljeće za turizam na području naše općine i vrijeme da se uberu plodovi rada Turist info biroa i svih drugih ustanova i pojedinaca koji su radili i rade na promociji vareškog kraja i njegovih turističkih potencijala, bez obzira da li se radi o prirodnim bogastvima koja su turistički primamljiva ili se radi o nečemu što je djelo ljudske ruke i što ima neprocjenjivu kulturno-historijsku vrijednost kako za općinu Vareš tako i za našu državu.

Sve gore rečeno je s razlogom, jer u petak 02. 04. smo imali posjetu 60 učenika i dva nastavnika koji su preko agencije «Artetravel» iz Sarajeva došli u posjetu Kraljevskom gradu Bobovcu i Kraljevoj Sutjesci. Ovom prilikom im je omogućeno natjecanje u srednjovjekovnim igrama kao što su potezanje konopa i gađanje lukom i strijelom, a posjetili su i grobnu kapelu i tom prilikom je naplaćeno 60 ulaznica po cijeni od 1 KM. U nedjelju 04. 04. 2010. godine smo imali posjetu osnovnoškolaca iz Sarajeva koji su sa našim certificiranim turističkim vodičima Teom Pentić, Admirom Čizmom i animatorom Mirzom Zecom obišli Kraljevski grad Bobovac i Kraljevu Sutjesku.

Druga grupa koju smo imali u nedjelju, a koja je došla preko agencije «Zebatus» iz Sarajeva je rezervirala i srednjovjekovni ručak za četrnaest svojih nastavnika koji im je pripremljen u selu Mijakovići nadomak Bobovca. U ovoj grupi je bilo 250 učenika, koji su također posjetili grobnu kapelu na Bobovcu, a za njih 167 je naplaćen ulaz po cijeni od 1 KM. Nadamo se da je ovo samo bio nagovještaj početka jedne uspješne turističke sezone za našu općinu.



OTVORENA DISKOTEKA

U većini naših gradova pa tako i u našem gradu mladi nisu imali veliki izbor gdje i kako provesti izlazne noći, gdje i kako se na jedan zdrav način zabaviti i družiti. S pravom možemo reći da je za varešku omladinu i sve one koji su ljubitelji noćnih izlazaka i druženja naročito u „izlaznim noćima“ (petak i subota) došlo bolje vrijeme. Razlog ovome je nedavno otvaranje Disco kluba „Campari“ u vlasništvu našeg muzičara Cigure Adisa, koji je sudeći po ambijentu koji nas dočeka kada uđemo u diskoteku uložio mnogo truda da bi sve bilo na vrhunskom nivou. Posebno nas raduje činjenica da je vlasnik objekta obratio veliku pažnju na sigurnost gostiju tako što je angažovao zaštitarsku agenciju koja se brine za red i sigurnost u diskoteci.

Naravno, nije sigurnost jedino što krasí ovu diskoteku ali ona je na prvom mjestu, što ovoj diskoteci daje bod više, a dodamo li tome ljubazno osoblje i vlasnika Adisa Ciguru uvijek nasmijanog i raspoloženog za razgovor sa svojim gostima, onda možemo reći da su mladi Vareša dobili jedan club u kojem mogu istinski uživati u druženju i zabaviti se uz vrhunsku muziku.

Posebno raduje činjenica da se u diskoteci preferira raznovrsna muzika tako da u toku jedne večeri bude za svakoga ponešto, pa mislim i za one najzahtjevnije i najprobriljivije. U razgovoru sa vlasnikom kluba saznajemo da u narednom periodu ima namjeru u svom klubu ugostiti neka od zvučnijih imena naše muzičke scene što svakako nedostaje našem gradu.

ASTRO VEČER

U općinskoj Velikoj sali je dana 09.04.2010 održano predavanje pod vodstvom predavača Nataše Bek i Maria Pastuovića iz Osijeka, prisustvovalo je nekih pedesetak učesnika svih starosnih skupina. Nakon predava-

vanja smo se zaputili prema Kotinjoj krivini sa koje smo promatrali nebo teleskopom, koje i nije bilo baš zvjezdano, ali ipak smo uspjeli vidjeti Mars i Saturn. Predavanje je organizirao klub ekstremnih sportova „Perun – Va“ iz Vareša, a u suradnji sa Turist info centrom Vareš. Tematski, predavanje je bilo veoma bogato i kroz samo predavanje predavači su pokušali dati odgovor na mnoga pitanja.

Što je Svemir, Kosmos, Vasiona ili Univerzum? Kako je nastao? Ima li početak i kraj? Kakva je njegova sudbina? Koja sve nebeska tijela putuju tim beskonačnim prostranstvom? Znamo li sve o njima? Što su crne rupe? Postoje li bijele rupe? Što je Veliki prasak? A Veliki stisak?

Kako to da zapravo gledamo u prošlost kada (po)gledamo nebo? Je li naš Svemir samo jedan od mnogobrojnih u Multiverzumu? Postoji li život još negdje u svemiru osim na Zemlji i dokle smo stigli u potrazi za istim? Planeti oko drugih zvijezda? Koliko smo ih do sada pronašli i postoje li neke slične Zemlji? Je li bilo života na Marsu? Kada ćemo, ako ćemo putovati međuzvjezdanim brodovima?

Nataša Bek, prof. fizike i politehnike s informatikom, rođena 15.2. 1975. godine u Varešu, trenutno živi u Osijeku, radi u osnovnoj školi u Vukovaru kao prof. fizike, tehničke kulture, informatike i astronomije.

Hobi joj je astronomija, dugogodišnja je članica i nekadašnja predsjednica Astronomskog društva „Anonymus“ iz Valpova, jednog od najaktivnijih društava u Hrvatskoj, redovno sudjeluje na Festivalu znanosti s astronomskim radionicama i temama, instruktor je u projektu „Nebo na poklon“, edukacijskom projektu upoznavanja učenika sa znanstvenom metodom kroz astronomiju, pokretač mnogih inicijativa vezanih uz popularizaciju astronomije kroz predavanja, radionice i astronomska promatranja za građanstvo u Osječko–baranjskoj i Vukovarsko–srijemskoj županiji. Par crtica o Anonymusu“: Društvo

„Anonymus“ ima tri prioriteta cilja, a to su: promicanje astronomije kao znanstvene vještine i aktiviranje astronomskih sekcija po osnovnim i srednjim školama, našto imamo veliki odaziv, provođenje programa podučavanja učenika osnovnih i srednjih škola u našem Društvu, znanstveni i amaterski radovi neposrednog proučavanja neba od strane samih članova pomoću vlastite opreme i u suradnji s drugim srodnim udrugama ili znanstvenim institucijama, kao što su fakulteti i instituti u Hrvatskoj i inozemstvu gdje smo do sada i imali najveću saradnju s međunarodnim institucijama za proučavanje asteroida, meteora, Sunca i drugih. Naše djelovanje je postalo prepoznatljivo kako u našoj županiji tako i širom Hrvatske i izvan nje, vjerujemo da i mammo potencijala i snage da tako i nastavimo.

Predavanje u okviru Astro-večeri i astronomske promatranje neba s Kotine krivine u Varešu pokrenulo bi međunarodnu suradnju Kluba ekstremnih sportova „Perun-Va“ iz Vareša i Astronomskog društva „Anonymus“ iz Valpova. Štoviše imamo već i konkretne prijedloge i ideje kako sprovesti u djelo jednu našu dugoplaniranu aktivnost organiziranja višednevnog izleta za varešku omladinu na more, planine, jezera. Nataša nam je predložila da se naša omladina pridruži njihovoj te da zajedno organiziramo sedmodnevni izlet na jedan mali otočić u blizini Šibenika.





KES „PERUN-VA“ VAREŠ



Nepal, država u južnoj Aziji bez izlaza na more. Graniči na jugu s Indijom i na sjeveru s Kinom. Sjeverni dio Nepala zauzima Himalaja, najviši planinski lanac na svijetu, a njegov najviši vrh, 8.850 m visoki Mount Everest na granici s Kinom ujedno je i najviša tačka na Zemlji. Od 18. svibnja 2006., Nepal je sekularna država. 28. prosinca 2007. privremena je vlada proglasila Nepal Demokratskom Saveznom Republikom, označivši time kraj 238 godina monarhije. Stanovnici Nepala pripadaju brojnim etničkim zajednicama od kojih su neke povezane s tradicionalnim kastinskim sustavom. Najbrojniji su Chetri (trad. Kšatrije, oko 16%), Brahmani (oko 13%), Magar (7%) i Tharu (6,75%). Etnički Šerpe, poznati kao vodiči alpinističkih ekspedicija čine 0.68% stanovništva. Hinduizam je najbrojnija religija (80%),

slijedi Budizam (11%). Nepalskim govori oko polovice stanovnika, a služi i kao lingua franca za govornike drugih jezika.

U vrijeme britanske kolonijalne vlasti u Indiji, Nepal je ostao neovisan, ali izoliran od vanjskog svijeta, plativši cijenu kroz gospodarsku nerazvijenost i zaostalost. Gospodarske reforme i djelomično otvaranje prema susjednoj Indiji u posljednjih nekoliko godina dovele su do promjena nabolje, ali izbijanje građanskog rata u kojem se marksistički pobunjenici bore protiv središnjih vlasti 1996. pogoršalo je izgleda za budućnost. Glavna gospodarska djelatnost i dalje je poljoprivreda, ali raste udio uslužnih djelatnosti (turizam).

Razlog objavljivanja ovog teksta je učestvovanje na takmičenju u ekstremnim sportovima člana Kluba ekstremnih sportova „Perun-Va“ Vareš, Ahmeda Likića koje je održano upravo u Nepal.

Podsjećamo, ideja o osnivanju kluba ekstremnih sportova nastaje 2005 godine od entuzijasta koji su počeli da se bave ovim sportom u Varešu. Nešto kasnije im se priključuju i povratnici koji su imali iskustva u državama EU-e. Klub i oficijelno počinje sa radom u aprilu 2009. godine, prvo virtualno a zatim i fizički sa prostorijama dobivenim na korištenje od Općine. Klub se zalaže za sport, turizam, očuvanje okoline, okupljanje omladine i promociju kako Vareša i vareškog kraja tako i države BiH.

Aktivni član ovog kluba koji radi na

promociji vareškog kraja je Ahmed Likić, koji je učestvovao na takmičenju u ekstremnim sportovima u disciplini paraglajding koje je održano u Nepal, a u organizaciji sličnih klubova iz gradova i država širom svijeta. Likić je u saradnji sa Klubom ekstremnih sportova „Extreme sport“ Sarajevo iz Sarajeva uspio otići na ovo takmičenje, a boravak u Nepal i svi dodatni troškovi su bili u vlastitoj režiji. S pravom zaključujemo da se Likić ovim sportom bavi zbog ljubavi prema ekstremnim sportovima a naročito prema paraglajdingu. Zašto i zbog čega Nepal? Kako saznajemo od Likića, razlog održavanja ovog takmičenja u Nepal je zbog njegove konfiguracije i povoljnih vjetrova i zračnih struja koje su neophodne za ovaj sport. Tačnije, samo takmičenje se održalo u podnožju Himalaja, gdje su kako kaže Likić zračne struje potrebne za paraglajding konstantne i nepromjenjive, tako da je ovo područje idealno za ovaj sport.

Skrećemo pažnju da u klubu pored sekcije paraglajding postoje i sljedeće sekcije: brdski biciklizam odnedavno i skijanje, a u skoroj budućnosti namjeravamo razvit i alpinizam, rafting, gorsku službu spašavanja, paintball, offroad, motocross, itd. Zbog same konfiguracije Vareša i okolnih sela, gdje imamo i veliki broj zabačenih mjesta mišljenja smo da nam je razvijanje sekcije gorske službe spašavanja najprioritetniji zadatak. Ostale sekcije ćemo razvijati u skladu sa mogućnostima i zainteresiranosti članova kluba.

IZ PROŠLOSTI VAREŠA

04. aprila 1968. godine svečano je otvorena nova zgrada gimnazije. (KOLEKTIV)

Krajem aprila 1968. godine izvršeno je otvaranje igrališta za male sportove ispred DTV «Partizan», uređene su tribine i postavljeni reflektori za noćne utakmice. (KOLEKTIV)

Početak aprila 1973. godine, puštena je u redovnu proizvodnju novosagrađena Pilana u Ponikvama. Planirana godišnja proizvodnja rezane građe Pilane iznosila je oko 40 hiljada metara kubnih. (VREMEPLOVI ZAVIČAJNE ZBIRKE)

Uz skromnu svečanost 17. aprila 1979. godine, puštena je u rad novosagrađena trafo-stanica u Vareš Majdanu, jačine 110/35/10

KV i dalekovod 110 KV Vareš TS Visoko...

U predvečerje 04. aprila 1989. godine, filmom «Azra» režisera Mirze Idrizovića, svečano je otvoren potpuno renovirani Gradski bioskop u Varešu. Uvedeno je centralno grijanje, postavljene nove stolice sa ukupno 272 mjesta, kupljene 2 nove kinoaparature i novo bioskopsko platno.. (VREMEPLOVI ZAVIČAJNE ZBIRKE)



Na osnovu člana 2. Zakona o osnovima bezbjednosti saobraćaja na putevima u BiH ("Službeni glasnik BiH", broj: 06/06. i broj: 44/07.), i člana 22. stav 1. tačka 2. Statuta Općine Vareš, broj: 01-25/09. od 29.01. 2009. godine, Općinsko vijeće Vareš na 17. sjednici održanoj 31.03. 2010. godine, d o n o s i

ODLUKU

o dopuni Odluke o bezbjednosti saobraćaja na putevima

Član 1.

U Odluci o bezbjednosti saobraćaja na putevima, broj: 01-12/04. od 05.02. 2004. godine i broj: 01-132/09. od 04.06. 2009. godine, iza člana 8. dodaje se novi član 8a. koji glasi:

"Član 8a."

"U ulici Čaršija, na platou ispred bivše ABS banke, trgovinskih, ugostiteljskih i drugih poslovnih objekata do pijace, od 1. maja do 30. septembra u vremenu od 08 do 23 sata nije dozvoljen saobraćaj motornim vozilima u oba smjera osim vozila za snadbjevanje kada obavljaju tu namjenu."

Član 2.

Ova Odluka stupa na snagu osmog dana od dana objavljivanja na oglasnoj tabli Općinskog vijeća Vareš.

PREDSJEDAVAJUĆI OPĆINSKOG VIJEĆA VAREŠ

Josip Malbašić

Odluka je objavljena na oglasnoj tabli Općine Vareš dana 01.04.2010. godine.

OPĆINSKI NAČELNIK Hamdo Fatić

Na temelju članka 13. stavak 2. Zakona o porezima Zeničko dobojskog kantona («Sl. novine Ze-Do kantona», br: 24/99 i 4/04), Zakona o doprinosima („Sl. novine F BiH“ br: 35/98, 54/00, 16/01, 37/01,1/02, 17/06 i 14/08) i članka 22. točka 2. Statuta općine Vareš, broj: 01-25/09, od 29.01.2009. godine, Općinsko vijeće Vareš na 17. sjednici, održanoj dana 31.03.2010. godine, donijelo je:

ODLUKU

o dopuni Odluke o niskoakumulativnim i deficitarnim djelatnostima

Članak 1.

U Odluci o niskoakumulativnim i deficitarnim djelatnostima, br: 01-32/01 od 28.02.2001. godine, u članku 2. st. 1. iza alineje 16. dodaje se nova alineja 17., koja glasi „frizeri“.

Članak 2.

Ova Odluka stupa na snagu osmog dana od dana objavljivanja na oglasnoj ploči Općine Vareš.

Broj: 01- 72/10

Vareš, 31.03. 2010. god.

PREDSJEDAVAJUĆI OPĆINSKOG VIJEĆA

Josip Malbašić

Na temelju članka 2.12. Izbornog zakona BiH ("Službeni glasnik BiH", broj: 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08 i 37/08) i članka 22. točka 24. Statuta općine Vareš, broj 01-25/09 od 29.01.2009. godine, Općinsko vijeće Vareš, na 17.sjednici održanoj 31.03. 2010. godine, d o n o s i

ODLUKU

o visini naknade članovima Općinske izborne komisije

Članak 1.

Članovi Općinske izborne komisije Vareš imaju pravo na stalnu mjesečnu novčanu naknadu za svoj rad i to:

-predsjednik u iznosu od 200,00 KM

-članovi / ce u iznosu od 150,00 KM

Članak 2.

Za realizaciju ove odluke zadužuje se Općinski načelnik.

Članak 3.

Ova Odluka stupa na snagu osmog dana od dana objavljivanja na oglasnoj ploči Općine Vareš.

PREDSJEDAVAJUĆI

OPĆINSKOG VIJEĆA

Josip Malbašić